



Na osnovu člana 22 Statuta Brčko distrikta Bosne i Hercegovine – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta Bosne i Hercegovine, na II. nastavku 43. redovne sjednice, održanom 18. marta 2019. godine, usvaja

ZAKON
O PLATAMA I NAKNADAMA ZAPOSLENIH U PRAVOSUĐU BRČKO DISTRIKTA
BOSNE I HERCEGOVINE

DIO PRVI - OPŠTE ODREDBE

Član 1
(Predmet)

Ovim zakonom propisuju se način utvrđivanja, obračun i isplata plata i naknada službenika i namještenika zaposlenih u pravosuđu Brčko distrikta Bosne i Hercegovine (u daljnjem tekstu: zaposleni), koji se finansiraju iz budžeta Brčko distrikta Bosne i Hercegovine (u daljnjem tekstu: Distrikt).

Član 2
(Primjena)

(1) Odredbe ovog zakona primjenjuju se na službenike s posebnim ovlaštenjima, službenike, namještenike, pripravnike i volontere u pravosuđu Brčko distrikta BiH.

(2) Odredbe ovog zakona ne primjenjuju se na nosioce pravosudnih funkcija, pravobranioca i zamjenika pravobranioca.

Član 3
(Pojmovi)

Pojmovi korišteni u ovom zakonu imaju sljedeće značenje:

- a) **Pravosuđe** – u smislu ovog zakona predstavlja budžetske korisnike koji se finansiraju iz budžeta Brčko distrikta BiH, a koje čine pravosudne institucije Brčko distrikta BiH s pratećim službama:

1. Pravosudna komisija Brčko distrikta BiH (u daljnjem tekstu: Pravosudna komisija) uključujući Sudsku policiju Brčko distrikta BiH (u daljnjem tekstu: Sudska policija),
 2. Apelacioni sud Brčko distrikta BiH (u daljnjem tekstu: Apelacioni sud),
 3. Osnovni sud Brčko distrikta BiH (u daljnjem tekstu: Osnovni sud),
 4. Tužilaštvo Brčko distrikta BiH (u daljnjem tekstu: Tužilaštvo),
 5. Kancelarija za pravnu pomoć Brčko distrikta BiH (u daljnjem tekstu: Kancelarija),
 6. Pravobranilaštvo Brčko distrikta BiH (u daljnjem tekstu: Pravobranilaštvo).
- b) **Budžet** - je akt kojim se utvrđuje plan finansijskih aktivnosti budžetskih korisnika, koji obuhvata projekciju iznosa prihoda i primanja utvrđenog iznosa rashoda i izdataka Brčko distrikta BiH (u daljnjem tekstu: Distrikt) za period od jedne fiskalne godine.
- c) **Zaposlenik** – je svako lice koje je u radnom odnosu u organima pravosuđa, koje ima status službenika ili namještenika, odnosno lice zaposleno na mandatnom radnom mjestu.
- d) **Nosilac pravosudne funkcije** – je predsjednik suda, sudija, glavni tužilac i tužilac.
- e) **Radno mjesto** – je utvrđeno zakonom i/ili aktom o unutrašnjoj organizaciji i sistematizaciji radnih mjesta pravosudnih institucija.
- f) **Platni razred** – je klasifikacioni element koji se utvrđuje za svako radno mjesto.
- g) **Koeficijent** – je broj dodijeljen svakom radnom mjestu razvrstanom u platne razrede i može imati više stepena.
- h) **Osnovica za obračun plata** – predstavlja utvrđeni novčani iznos koji se koristi za određivanje osnovne plate.
- i) **Plata** - predstavlja novčanu vrijednost ostvarenu po osnovu radnog odnosa.
- j) **Efektivno radno vrijeme** – predstavlja radno vrijeme provedeno na radu, koje se ne odnosi na privremenu spriječenost za rad, godišnje odmore, plaćena odsustva te druga odsustva utvrđena posebnim propisima za vrijeme kojih zaposleni ne provodi vrijeme na radu.
- k) **Lica s posebnim ovlaštenjima u pravosuđu su** – zaposleni s visokim stepenom odgovornosti u odlučivanju čiji su poslovi od posebnog značaja za funkcionisanje, upravljanje ili predstavljanje pravosudne institucije, a koji su kao takvi određeni posebnim zakonom ili posebnom odlukom Pravosudne komisije.

Član 4 (Principi)

Prilikom određivanja kategorije platnog razreda i iznosa plata i naknada vrijede sljedeći principi:

- a) **Ista plata za isti ili sličan posao** – zaposleni u istoj ili različitoj pravosudnoj instituciji u kojima obavljaju iste ili slične poslove svrstavaju se u isti platni razred.
- b) **Transparentnost** – podrazumijeva da je osnovna plata za svako pojedinačno radno mjesto javna.

- c) **Fiskalna odgovornost** – Skupština Brčko distrikta BiH na prijedlog Pravosudne komisije, može predložiti promjene osnovice za obračun plate, ako je to u interesu održavanja makroekonomske stabilnosti.

DIO DRUGI - UTVRĐIVANJE PLATE

Član 5 (Osiguranje sredstava za plate)

Sredstva za plate i naknade u smislu ovog zakona obezbjeđuju se u budžetu Distrikta.

Član 6 (Plata)

- (1) Plata zaposlenih utvrđuje se u bruto i neto iznosu.
- (2) Plata u bruto iznosu obuhvata neto platu, poreze i doprinose.
- (3) Plata u neto iznosu sastoji se od osnovne plate i dodataka na platu i utvrđuje se prije oporezivanja.

Član 7 (Utvrđivanje osnovne plate i osnovica za obračun plata)

- (1) Osnovna plata utvrđuje se množenjem osnovice za obračun plate i pripadajućeg koeficijenta, odnosno stepena koeficijenta platnog razreda.
- (2) Osnovica za obračun plate za period od 1. 7. do 31. 12. 2019. godine utvrđuje se u iznosu od 654,20 KM.
- (3) Izuzetno od stava 2 ovog člana, visina osnovice za obračun plata koja predstavlja i najnižu platu, utvrđuje Skupština Brčko distrikta BiH odlukom na prijedlog Direkcije za finansije Brčko distrikta BiH (u daljnjem tekstu: Direkcija), prije pokretanja postupka izrade zahtjeva za plate za budžet za narednu godinu.
- (4) Osnovica iz stava 3 ovog člana ne može biti manja od najniže, više plate u entitetima na koju se obračunavaju obavezni doprinosi.
- (5) Do usvajanja budžeta za tekuću fiskalnu godinu primjenjuje se osnovica iz prethodne fiskalne godine.
- (6) Ukoliko budžet za narednu fiskalnu godinu ne bude usvojen do 31. decembra tekuće godine, nova osnovica za obračun plate primjenjivat će se tek od narednog mjeseca od dana usvajanja budžeta.

DIO TREĆI - PLATNI RAZREDI

Član 8 (Razvrstavanje u platne razrede)

(1) Radna mjesta razvrstavaju se u deset (X) platnih razreda, izraženih podrazredom i odgovarajućim koeficijentom koji predstavlja osnovni klasifikacioni element sistema plaćanja rada zaposlenih.

(2) Platni razred određene kategorije radnih mjesta se određuje na osnovu: stepena obrazovanja, vrste i složenosti poslova, stepena odgovornosti i ovlaštenja, te drugih kriterija koje radno mjesto zahtijeva.

(3) Pojedina službenička i namještenička radna mjesta se razvrstavaju u različite podrazrede, odnosno stepene koeficijenata unutar odgovarajućeg platnog razreda.

Član 9

(Platni razredi, podrazredi i koeficijenti)

Platni razredi, podrazredi i koeficijenti utvrđeni članom 8 stavom 1 ovog zakona prikazani su u sljedećoj tabeli:

Platni razred	Platni podrazred	Koeficijent
I	I1	1,000000
II	II1	1,026355
	II2	1,050471
	II3	1,072636
	II4	1,093132
	II5	1,112244
	II6	1,130256
III	III1	1,147450
	III2	1,164113
	III3	1,180527
	III4	1,196977
	III5	1,213747
	III6	1,231121
IV	IV1	1,249382
	IV2	1,268815
	IV3	1,289706
	IV4	1,312335
	IV5	1,336988
	IV6	1,363949

V	V1	1,393503
	V2	1,425934
	V3	1,461525
	V4	1,500558
	V5	1,543321
	V6	1,590096
VI	VI1	1,641168
	VI2	1,696820
	VI3	1,757335
	VI4	1,823000
	VI5	1,894097
	VI6	1,970912
VII	VII1	2,053726
	VII2	2,142825
	VII3	2,238493
	VII4	2,341014
	VII5	2,450671
	VII6	2,567748
VIII	VIII1	2,692531
	VIII2	2,825302
	VIII3	2,966347
	VIII4	3,115949
	VIII5	3,274392
	VIII6	3,441960
IX	IX1	3,618936
	IX2	3,805606
	IX3	4,002252
	IX4	4,209162
	IX5	4,426614
	IX6	4,654898
X	X1	4,894294
	X2	5,145087
	X3	5,407561
	X4	5,682001
	X5	5,968690
	X6	6,267915

Član 10

(Platni razredi i koeficijenti za rukovodećeg službenika s posebnim ovlaštenjima i službenika s posebnim ovlaštenjima)

Platni razred	Radna mjesta	Podrazred	Koeficijent
X	Direktor Kancelarije za pravnu pomoć	4	5,682001
IX	Advokat Kancelarije za pravnu pomoć	6	4,654898

Član 11

(Platni razredi i koeficijenti za rukovodećeg službenika)

Platni razred	Radna mjesta	Podrazred	Koeficijent
IX	Sekretar Pravosudne komisije i sekretar Osnovnog i Apelacionog suda	5	4,426614
IX	Sekretar Tužilaštva i sekretar Pravobranilaštva	4	4,209162
IX	Komandir Sudske policije, šef Finansija pravosuđa, šef Službe informacionih tehnologija i šef Odjeljenja za zemljišnoknjižne poslove Osnovnog suda	1	3,618936
VIII	Zamjenik komandira Sudske policije	3	2,966347
VII	Šef Administracije i šef Pisarnice	6	2,567748

Član 12

(Platni razredi i koeficijenti za službenike stručnjake/eksperte)

Platni razred	Radna mjesta	Podrazred	Koeficijent
VIII	Pomoćnik sekretara - portparol Pravosudne komisije Stručni saradnik i specijalista za informacione tehnologije Pravosudne komisije	4	3,115949
VIII	Diplomirani pravnik u zemljišnoknjižnom uredu Osnovnog suda	2	2,825302
VII	Samostalni referent za finansije i računovodstvo u Pravosudnoj komisiji	6	2,567748

Član 13
(Platni razredi i koeficijenti za službenike izvršioce)

Platni razred	Radna mjesta	Podrazred	Koeficijent
VI	Sudski policajac	1	1,641168
	Stariji Sudski policajac	2	1,696820
	Narednik Sudske policije	4	1,823000
	Stariji narednik Sudske policije	6	1,970912
V	Tehničar za informacione tehnologije, referent za prinudnu naplatu-sudski izvršitelj i istražitelj u Kancelariji za pravnu pomoć	6	1,590096
V	Sekretarica predsjednika Pravosudne komisije-asistent, referent za unutrašnju kontrolu i sistem tehničke zaštite, službenik finansijsko-računovodstvene službe (koji vodi blagajnu), sekretarica predsjednika Osnovnog suda, sekretarica direktora Kancelarije za pravnu pomoć-asistent, službenik finansijsko-računovodstvene službe, operater na sistemu tehničke zaštite, pomoćnik sekretara Osnovnog suda, referent za upravljanje predmetima, operater-upisničar izvršenja prekršajnih sankcija, operater-upisničar registracije poslovnih subjekata, operater-referent za ovjeru, operater-referent zemljišnoknjižnih poslova, operater-upisničar, referent za unos dokumenata, operater-asistent, referent-operater-asistent, arhivar-operater	5	1,543321
V	kurir-vozač-domar i vozač-kurir	3	1,461525
V	referent na otpremi pošte	1	1,393503
IV	radnik na prijavnici i obezbjeđenju	4	1,312335

Član 14
(Platni razredi i koeficijenti za pomoćne namještenike)

Platni razred	Radna mjesta	Podrazred	Koeficijent
III	Radnik na održavanju-domar i kurir	6	1,231121
I	Higijeničar	1	1,000000

DIO ČETVRTI – DODACI NA PLATU, NAKNADE, OTPREMNINE, POMOĆI I NOVČANE NAGRADE

Član 15 (Dodatak na radni staž)

Osnovna plata zaposlenog povećava se za 0,30 % (nula zarez trideset posto) na osnovnu platu za svaku navršenu godinu radnog staža.

Član 16 (Dodatak na platu za vrijeme provedeno na radu)

(1) Zaposleni ima pravo dodatka na osnovnu platu, srazmjerno vremenu provedenom na radu u sljedećim slučajevima:

- a) noćni rad za 30 % od osnovne plate,
- b) rad subotom i nedjeljom za 20 % od osnovne plate,
- c) rad tokom praznika za 35 % od osnovne plate.

(2) Pravo i obaveza iz prethodnog stava moraju biti utvrđeni posebnim propisom.

(3) Dodaci iz stava 1 ovog člana se međusobno ne isključuju.

Član 17 (Dodatak na platu za posebne uslove rada)

(1) Zavisno od rizika, složenosti poslova, posebnih uslova rada i primjene ovlaštenja, zaposlenici na radnim mjestima u Sudskoj policiji imaju pravo na trajni dodatak za posebne uslove rada.

(2) Dodatak za posebne uslove rada je trajno vezan za radna mjesta iz stava 1 ovog člana, te ne može biti izmijenjen ukoliko ne nastupe novi posebni uslovi rada.

(3) Dodatak za posebne uslove rada službenika Sudske policije iznosi do 30 % osnovne plate.

(4) Dodatak za posebne uslove rada isplaćuje se službenicima Sudske policije za vrijeme trajanja bolovanja ukoliko je osnov bolovanja povreda na radu, profesionalno oboljenje, trudničko i porodiljsko bolovanje.

(5) Odluku o visini dodatka za posebne uslove rada donosi Pravosudna komisija na prijedlog komandira Sudske policije.

Član 18

(Dodatak na platu za radna mjesta s posebnim ovlaštenjima i mandatna radna mjesta)

- (1) Službenici s posebnim ovlaštenjima i službenici imenovani na mandatna radna mjesta u pravosuđu Distrikta imaju pravo na dodatak na osnovnu platu u visini do 20 % osnovne plate radnog mjesta na koje su imenovani.
- (2) Status službenika s posebnim ovlaštenjima određuje se posebnim zakonom ili posebnom odlukom Pravosudne komisije za radna mjesta od posebnog značaja za funkcionisanje, upravljanje ili predstavljanje pravosudne institucije.
- (3) Odluku o visini dodatka iz stava 1 donosi Pravosudna komisija na prijedlog rukovodioca pravosudne institucije.
- (4) Odluke iz stavova 2 i 3 ovog člana donose se uz prethodnu saglasnost Komisije za budžet i Komisije za praćenje rada Vlade i institucija Distrikta i predstavke građana Skupštine Brčko distrikta Bosne i Hercegovine.

Član 19

(Dodatak za dežurstvo i pripravnost)

- (1) Zaposleni koji radi na radnom mjestu na kojem je organizovan rad dežurstva i pripravnosti, ima pravo dodatka na platu i to:
 - a) za dežurstvo radnim danom u iznosu od 7 % osnovne mjesečne plate,
 - b) za dežurstvo u dane vikenda i praznika u iznosu od 9 % osnovne mjesečne plate,
 - c) za pripravnost u iznosu od 4 % osnovne mjesečne plate.
- (2) Radna mjesta iz stava 1 ovog člana utvrđuju se odlukom rukovodioca Pravosudne institucije.

Član 20

(Naknada plate)

- (1) Ovim zakonom utvrđuje se naknada plate za:
 - a) godišnji odmor i plaćeno odsustvo u visini osnovne plate uvećane za dodatak na platu po osnovu radnog staža,
 - b) praznik i vjerski praznik u visini osnovne plate uvećane za dodatak na platu po osnovu radnog staža,
 - c) prekid rada koji je nastupio zbog okolnosti na koje zaposleni nije mogao uticati, u visini osnovne plate uvećane za dodatak na platu po osnovu radnog staža,

- d) privremenu spriječenost za rad zbog bolovanja i drugih slučajeva predviđenih zakonom o zdravstvenom osiguranju u visini i na način kako je regulisano tim zakonom, u visini osnovne plate uvećane za dodatak na platu po osnovu radnog staža,
- e) jednog od roditelja djeteta s teškim smetnjama u razvoju koji radi polovicu punog radnog vremena, kada se radi o samohranom roditelju ili kada su oba roditelja zaposlena,
- f) jednog od roditelja djeteta kojem je, prema nalazu zdravstvene ustanove ili ljekara, potrebna pojačana briga i njega nakon isteka porodiljskog odsustva, dok dijete ne navrši dvije godine života,
- g) vrijeme produženja radno-pravnog statusa lica zaposlenih na mandatnim radnim mjestima, u skladu s posebnim zakonom,
- h) privremene spriječenosti za rad zbog suspenzije u skladu sa zakonom.

Član 21 (Naknada troškova)

- (1) Zaposleni ima pravo naknade troškova za:
 - a) odvojeni život i smještaj, s tim da visina naknade po ovom osnovu može iznositi maksimalno do visine 80 % od osnovice za obračun plate,
 - b) službena putovanja kao što su dnevnice, troškovi prevoza i slično.
- (2) Visina i način obračuna troškova iz stava 1 ovog člana utvrđuju se po istim uslovima i iznosima propisanim za službenike i namještenike u organima uprave Brčko distrikta BiH.

Član 22 (Otpremnine)

Zaposleni ima pravo na otpremninu u sljedećim slučajevima:

- a) prilikom sticanja uslova za odlazak u penziju u visini trostrukog iznosa posljednje bruto plate zaposlenog ili trostrukog iznosa prosječne isplaćene bruto plate zaposlenih u pravosuđu, u mjesecu koji prethodi mjesecu odlaska zaposlenog u penziju, ukoliko je to za zaposlenog povoljnije,
- b) za prekobrojnost u visini šesterostrukog iznosa zadnje isplaćene bruto plate zaposlenog s radnim stažom do petnaest (15) godina,
- c) za prekobrojnost u visini dvanaestostrukog iznosa zadnje isplaćene bruto plate zaposlenog s radnim stažom od petnaest (15) godina i više.

Član 23 (Novčane pomoći)

- (1) Zaposleni ili porodica ima pravo na jednokratnu novčanu pomoć u sljedećim slučajevima:
 - a) smrti roditelja, bračnog partnera ili djeteta u visini od dvije najniže plate u pravosuđu,
 - b) porodica u slučaju smrti zaposlenog ima pravo na novčanu pomoć u visini od tri najniže plate u pravosuđu,

- c) zaposlenom, u slučaju privremene spriječenosti za rad zbog bolesti, pripada jednom godišnje jednokratna pomoć u visini od dvije najniže plate u pravosuđu, ako je odsustvovanje s posla duže od šest mjeseci.

(2) Ukoliko više zaposlenih prima platu iz budžeta Distrikta u slučaju navedenom u stavu 1 tačkama a) i b) ovog člana, pomoć može dobiti samo jedan zaposleni i to onaj koji snosi troškove sahrane.

(3) Izuzetno od stava 1 tački a) i b) ovog člana službenik Sudske policije koji izgubi život na dužnosti sahranjuje se na trošak Pravosudne komisije na mjestu na kojem odredi njegova porodica.

(4) Sudska policija snosi sljedeće posmrtno troškove:

- a) troškove za prevoz posmrtnih ostataka na mjesto sahrane,
- b) putne troškove za dva prateća lica,
- c) trošak za grobnicu ako nije već osigurana na drugi način,
- d) druge uobičajene troškove u iznosu koje odredi komandir Sudske policije.

Član 24 (Novčane nagrade)

(1) Novčana nagrada je stimulacija koja se može isplaćivati zaposlenom za posebna zalaganja i rezultate u radu u tekućoj godini u jednokratnom iznosu.

(2) Fond za nagrade može iznositi maksimalno do 2,00 % od ukupnog budžeta plata za one zaposlene koji imaju pravo na stimulaciju.

(3) Iznos pojedinačne godišnje stimulacije zaposlenom, po osnovu navedenom u stavu 1 ovog člana, može iznositi maksimalno do 10 % njegove godišnje osnovne plate.

(4) Ostala pitanja vezana za novčane nagrade u skladu s ovim članom definišu se Pravilnikom o ocjenjivanju.

DIO PETI – PRIPRAVNICI I VOLONTERI

Član 25 (Plata pripravnika)

Osnovna plata pripravnika utvrđuje se u iznosu od 80 % od osnovne plate najnižeg stepena koeficijenta platnog razreda određenog za stručnu spremu koju posjeduje pripravnik.

Član 26 (Naknada volonterima)

Volonter u pravosuđu ima pravo na naknadu u iznosu od 25 % od osnovne plate najnižeg stepena koeficijenta platnog razreda određenog za stručnu spremu koju posjeduje volonter.

DIO ŠESTI – OBRAČUN I ISPLATA PLATA I NADZOR NAD PRIMJENOM ZAKONA

Član 27 (Obračun i isplata plata)

(1) Direkcija za finansije Distrikta vrši obračun i isplatu plata za budžetske korisnike korištenjem sistema centralizovanog obračuna plata, po zahtjevu budžetskog korisnika za obračun i isplatu plata.

(2) Isplata plata po novoj osnovici se primjenjuje nakon usvajanja budžeta za tekuću fiskalnu godinu.

(3) Isplata plata se vrši najkasnije do 10. dana u mjesecu za prethodni mjesec.

(4) Do usvajanja budžeta za tekuću fiskalnu godinu primjenjuje se osnovica iz prethodne godine.

(5) Ne može se vršiti obračun plata retroaktivnim dejstvom za ona radna mjesta gdje je promijenjena osnovica ili koeficijent platnog razreda.

Član 28 (Nadzor nad primjenom zakona)

Nadzor nad primjenom ovog zakona vrši Pravosudna komisija.

DIO SEDMI – KAZNENE ODREDBE

Član 29 (Novčane kazne)

Novčanom kaznom u iznosu od 1.000 KM do 3.000 KM kaznit će se za prekršaj rukovodilac pravosudne institucije kao i odgovorno lice ako:

- a) Pravilnikom o unutrašnjoj organizaciji i sistematizaciji radnih mjesta razvrstava radno mjesto u platni razred koji po ovom zakonu ne pripada tom radnom mjestu,
- b) odobri zahtjev za isplatu dodatka na platu ili naknadu plate, suprotno odredbama ovog zakona,
- c) odobri zahtjev za isplatu novčane pomoći ili nagrade, suprotno odredbama ovog zakona.

DIO OSMI – PRIJELAZNE I ZAVRŠNE ODREDBE

Član 30 (Obaveze dostavljanja podataka)

Obavezuju se zaposleni u pravosuđu Distrikta, na koje se odnosi ovaj zakon, da Pravosudnoj komisiji dostave podatke o radnom stažu od strane nadležnog penzijsko-invalidskog fonda, kako bi se ostvarilo pravo po osnovu dodatka na platu.

Član 31 (Usklađivanje unutrašnje sistematizacije i izrada zahtjeva za plate)

(1) Rukovodioci pravosudnih institucija su dužni u roku od 90 dana od dana stupanja na snagu ovog zakona, uz saglasnost Pravosudne komisije, uskladiti postojeće akte o unutrašnjoj organizaciji i sistematizaciji radnih mjesta s odgovarajućim odredbama ovog zakona.

(2) Rukovodioci pravosudnih institucija su dužni izraditi zahtjeve za budžet u dijelu koji se odnosi na plate zaposlenih na koje se odnosi ovaj zakon.

Član 32 (Stavljanje van snage)

(1) Danom početka primjene ovog zakona stavlja se van snage Zakon o platama zaposlenih u pravosuđu Brčko distrikta BiH – prečišćeni tekst (Službeni glasnik Brčko distrikta BiH, broj 22/18).

(2) Odredbe posebnih zakona i drugih propisa koji regulišu oblast dodataka na platu, naknada na platu, visinu i način obračuna istih stupanjem na snagu ovog zakona se stavljaju van snage.

Član 33 (Stupanje na snagu i primjena)

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH, a primjenjuje se od 1. 7. 2019. godine.

Broj: 01-02-560/19
Brčko, 18. 3. 2019. godine

PREDSJEDNIK
SKUPŠTINE BRČKO DISTRIKTA BiH
Esed Kadrić